



Sud Bosne i Hercegovine
Sud Bosne i Hecegovine

Broj: S1 3 Iž 037873 20 Iž
Sarajevo, 23.10.2020. godine

Sud Bosne i Hercegovine u Sarajevu, u apelacionom vijeću sastavljenom od sudija Vesne Trifunović, predsjednice vijeća, Srete Crnjaka i Dinke Bešlagić Čovrk, članova vijeća, odlučujući o žalbi žaliteljice Šenderović – Šabić Amre, ul. Route de Giez 6, 1422, Grandson, Švicarska, izjavljenoj protiv Odluke Centralne izborne komisije Bosne i Hercegovine broj 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje van BiH za Lokalne izbore 2020.godine, u nejavnoj sjednici, održanoj dana 23.10.2020. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje van BiH za Lokalne izbore 2020. godine za ukupno 27.960 birača po prijavama podnesenim do 1.9.2020. godine, zbog neispunjavanja uslova iz odredbi člana 3.15 stav 1., 2. i 3. Izbornog zakona BiH, među kojima se nalazi i žalitelj.

Protiv ove odluke žaliteljica je blagovremeno, putem maila drugog lica, uložila žalbu u kojoj navodi da je utvrdio da se ne nalazi na spisku glasača za glasanje putem pošte jer je prijavljen na više adresa, uz upit koje se greške trebaju ispraviti da bi registracija bila validna.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbaci kao nedopuštena, jer je izjavljena od neovlaštenog lica, odnosno da se odbije kao neosnovana.

Ispitujući ožalbenu odluku u okviru žalbenih navoda vijeće je zaključilo da žalba nije osnovana.

Prema stanju u spisu ovo vijeće konstatuje da je CIK BiH, prije donošenja ožalbene odluke, a prilikom razmatranja prijave dostavljene za žaliteljicu, utvrdio da su za

žaliteljicu dostavljene dvije prijave na PRP-1 i na PRP-2 Obrascu - Prijava za glasanje izvan BiH, te da su u prijavama navedene različite adrese na koje će biti upućen glasački materijal. U prvoj prijavi je navedena adresa: Lopatanj, Osečina 14253 Srbija, dok je u drugoj prijavi navedena adresa: Route de Giez 6, 1422 Grandson, Švicarska.

S obzirom na ovakvo činjenično stanje, po shvatanju suda, pravilan je zaključak CIK BiH da se druga zaprimljena prijava na ime žaliteljice ne može smatrati obaviješću o promjeni adrese u smislu člana 3.16 stav 1. Izbornog zakona BiH, s obzirom da žaliteljica podnošenjem druge prijave nije ukazala na postojanje prve prijave, niti je dostavila traženu potvrdu o prebivalištu/boravištu u inostranstvu.

Iz navedenih razloga CIK BiH nije bila u mogućnosti utvrditi koja je od podnesenih prijava vjerodostojna, što je žaliteljica bila dužan dokazati u smislu odredbe člana 3.15 stav 1. i 7. Izbornog zakona BiH, a što je ista propustila učiniti u postupku ocjene vjerodostojnosti podnesene prijave.

Sve navedeno ukazuje da se radi o zloupotrebi biračkog prava odnosno prava na glasanje iz inostranstva, te je pobijana odluka CIK BiH, pravilna i zakonita i njom se sankcionira pokušaj zloupotrebe navedenog prava.

Izrada izvoda iz Centralnog biračkog spiska za birače koji glasaju van BiH prema odredbi člana 3.6 stav 4. Izbornog zakona BiH, vrši se na osnovu podataka koje ima Centralna izborna komisija BiH i podataka koje dostavljaju građani koji glasaju van BiH. Tek ako ispuni sve propisane uslove iz stava 1., 2. i 3. člana 3.15 Izbornog zakona BiH, podnosilac prijave se može naći na izvodu iz Centralnog biračkog spiska za glasanje van BiH.

U predmetnom slučaju žaliteljica ni u naknadnom roku nije dostavila potvrdu o prebivalištu/boravištu – odnosno podatke o tačnoj adresi u inostranstvu u smislu odredbe člana 3.15 Izbornog zakona BiH, zbog čega nisu ispunjeni uslovi da se u smislu člana 3.15 stav 6. Izbornog zakona BiH nađe na izvodu iz Centralnog biračkog spiska.

Pobijanom odlukom žaliteljici nije oduzeto biračko pravo jer će na dan Lokalnih izbora 2020. godine moći glasati na redovnom biračkom mjestu u opštini prebivališta.

Iz navedenih razloga Apelaciono vijeće ovog suda nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

**PREDSJEDNICA VIJEĆA
SUDIJA**

Vesna Trifunović